

Nunatsinni sanaartornikkut suliffeqarfiutilinnut mikisunut angivallaanngittunullu sanaartornikkut aningaasalersuutitigullu annertunerusumik akuutitsisinnaaner at pillugu apeqquteqaat aallaavigalugu oqallinnissamik siunnersuut.

(Inatsisartuni ilaasortaq, Doris J. Jensen, Siumut)

Akissuteqaat

(Ineqarnermut Attaveqaqatigiinnermullu Naalakkersuisoq)

Siullermeerneqarnera

Naalakkersuisut sinnerlugit Inatsisartuni ilaasortaq Doris J. Jensen, Siumut, Nuummi Nunatsinni sanaartornikkut suliffeqarfiutilinnut mikisunut angivallaanngittunullu sanaartornikkut aningaasalersuutitigullu annertunerusumik akuutitsisinnaaner at pillugu apeqquteqaat aallaavigalugu oqallinnissamik siunnersuuteqarneranut qutsavigaara.

Pisortat illuliortiternermi sanaartornermilu sulianut aningaasalersuinerisa naapertuuttumik ingerlanissaa Naalakkersuisunit pingaartinneqarpoq, aammalu suliassat nunatsinni sulisartunit nunaqavissunit suliarineqarnissaat Naalakkersuisut pingaartittorujussuaat.

Tamatuma saniatigut Naalakkersuisut sanatitsisutut inissisimanertik pimooruppaat, ilaatigut tamatuma nunatsinni suliassaqarnissamut isumaqarnera pissutigalugu. Taamaattumittaaq sanaartugassat sumiiffinni ataasiakkaani ukiut arlallit ingerlanerini assigiiaartumik ingerlasussanngorlugit ataqatigiissaarneqarnissaat qulakkeerneqarnissaallu Naalakkersuisut anguniagaraat.

Tamanna anguneqassappat sakkussat arlallit atorneqartussaapput; inatsisit, aningaasaqarnermi sinaakkusiussat minnerunngitsumillu suliassanik tulleriiaarinerit pilersaarusiorterillu.

Neqerooruteqartarnermut inatsit aqqutigalugu pisortat illuliassaasa sanaartugassaasalu aamma pisortanit tapiiffigineqartumik illuliassat sanaartugassallu tamarmik neqerooruteqartitsivigineqartarnissaat qulakkiissavarput. Tassalu inatsimmi neqerooruteqartut akornanni kinaassusersiunnginnissap assigiimmillu pinninnissap, taamatullu naammaginarumik unammilleqatigiissitsinissap qulakkeerneqarnissaa siunertarineqarpoq. Namminersorlutik Oqartussat illuliassaataat sanaartugassaataallu tamangajammik suliassanut immikkoortiterlugit neqerooruteqartitsivigineqartarput, tamanik suliqaarnissamut neqerooruteqartitsinissamut periarfissiisoqarluni.

Pisortat illuliassaataanni illuliortiternermi sanaartornermilu ilinniartut pillugit nalunaarut malinneqartarpoq, tassanilu Naalakkersuisut illuliassaataannut neqerooruteqartitsisarnermut najoqqutassat nutarterlugit aallartinneqarput, illuliassani sanaartugassanilu ilinniartoqartarneq pitsaanerusumik aqussinnaaniarlugu nakkutigisinnaaniarlugulu.

Taamaattumik suliassanut pilersaarusiornissarput, taamaalillutalu illuliortiternernik sanaartornermillu suliqaartut akimorlugit ingerlaavartumik suliassaqartitsinissamut pitsaanerpaamik tapersiinnissarput pingaaruteqaqaaq. Naalakkersuisut immikkoortunut

UKA 2020/107

IAN - Suliaq normu: 2020 - 17714

pilersaarusiornikkut taamaaliussapput, taakkulu immikkoortunut arlalinnut ilanngunneqareerput, ilaallu maanna suliarineqarlutik.

Pilersaarusiornermi najukkani pissutsit isiginiarneqartarput, taamaalilluni najukkani sanasut sunik pisinnaasaqarnersut, suliaassallu suliarinissaannut piffissamut pilersaarusiornissaq eqqarsaatigineqarsinnaassallutik. Tunngavissat taakku marluusut suliaassat naammassineqarnissaannut pingaaruteqarluinnarsinnaapput.

Sanaartornermi suliat amerlavallaaleraangata, aammalu sanasut naammangikkaangata entreprenørit mesterillu sulisussanik nunap avataaniit tikisitsisariaqartartut nalunngilarput. Sulisut angalaneri ineqarnerilu akilerneqartussanngoraangata tamanna suliaassanik akisunerulersitsisarpoq – taakku tamarmik sanasunik maanga tikisitsinissamut pisariaqarmata, aammami nunani allani sanasunik pisariaqartitsisoqartarmat. Taakkununga aningaasartuuteqarnerussutit naggataagut sullitanit akilerneqartussaapput. Taamaattumik assasornermik suliaassarfiit immikkoortuini tamani amerlanerusunik ilinniartitsinissaq, taamaalillunilu suliaassat sulisunit najugaqavissunit suliarineqarsinnaanissaat Naalackersuisut siunnerfigaat.

Sulisartut nunaqavissut suliaassanik isumaginnittuuppata, tamanna inuiaqatigiinnut peqqinnarnerussaaq. Tulluusimaarutaassaaq, aammalu tamatuma sanaartukkani pitsaassutsip qaffasinneruneranik kinguneqarnissaa kissaatiginarluni.

Maannarpiaq Naalackersuisut nuna tamakkerlugu ineqarnermi suliaassat isumagineqarnissaannut arlalinnik anguniagaqarput, ingerlaavartumik suliaqarnissamik qulakkeereqataasussanik. Tassunga tunngatillugu immikkut taarusuppakka:

- Sanaartornermi atortut najukkani suliarineqartut atorlugit sanaartorerit iluarsaassinerillu – nunatsinni sumiiffinni arlalinni najukkani tunisassiat atorlugit iluatsitsiviusumik aallartitsisoqareerpoq.
- Inissiat qungujulasut – oqummik ajornartorsiuteqarnermik qaangiiniarluta, taamaalillutalu illoqarfanni arlalinni Namminersorlutik Oqartussat najugaqarfiini inissiat inoqanngitsut ikilisinniarlugit suliniuterput. Iluarsaassisarnermut malitassami tassani inissiap tamakkerluni iluarsaanneqartarnissaa, aammalu neqerooruteqaqqusineq atorlugit suliaassat neqerooruteqartitsivigineqartarnissaat aallaavigineqarpoq. Sulianut taakkununga qularnaveeqqusiinissamut piumasaqaatit saneqqunneqassapput, tamannalu najukkani suliffeqarfiit – pingaartumik minnerit – suliaassanik tiguisinnaaneramik qulakkeereqataassaaq.

Suliaassat annertussusii allanngorarput, aammalu neqerooruteqartarnermut inatsit naapertorlugu suliaassarpasut pisortanit neqerooruteqartitsivigineqartarput, amerlasuunilu neqerooruteqaqqusineq atorneqartarluni. Illuliortiternermi sanaartornermilu sullissisut tamarmik peqataasinnaanissaat, taamaalillunilu suliaassat naapertuuttumik agguarsinnaanissaat qulakkeerniarlugu suliaassanut angisuunut, akunnattumik angissusilinnut taamatullu misikunut neqerooruteqartitsisarnitsinnik atuutsitsiinnarnissarput pingaaruteqarpoq. Neqerooruteqartarnermut inatsimmut allannguutissamik siunnersuusiornikkut tamanna naammassiniarneqarpoq, taannalu ataatsimiinnermi matumani suliarineqassaaq.

'Sanaartornermut maleruagassat naleqqussarneqarnissaannik nutarterneqarnissaannillu pisariaqartitsineq pillugu nassuiaat' Naalackersuisunit 2019-mi ukiakkut ataatsimiinnermi agguaanneqarpoq, tassanilu maanna maleruagassat massakkuugallartoq atuutsiinnarneqarnissaat inassutigineqarpoq.

Naalackersuisut sinnerlugit oqallilluarnissassinnik kissaappassi aammalu partiit isummersuutaasa tusarnissaannut qilanaarpunga.